

Berita Harian : 21 Mei 2015

**Penulis ialah Dr. Muhammad Arif B. Mohd Hashim, Yang Dipertua
Gabungan Profesional dan Usahawan Bumiputera Anak Selangor (GIBS)**

ILTIZAM PUPUK PERPADUAN UMMAH UNGGUL

Kebelakangan ini, kita dapati sebahagian pemimpin Islam dan Melayu bercakaran dan membuat teguran sesama sendiri secara terbuka sehingga bangsa Melayu dan umat Islam dilihat berpecah. Perbalahan dan perpecahan ummah yang berlaku dalam sejarah Islam yang menyumbang kepada kejatuhan Islam dan sukar untuk bangun semula, wajar dijadikan ikhtibar.

Bangsa Melayu wajar mengingati sejarah ini dan tidak terus leka dengan mengeratkan silaturrahim bagi mengekalkan perpaduan agar menjadi bangsa yang kuat, disegani, bermaruah dan diberkati Allah.

Islam sebagai agama tauhid meletakkan gagasan kesatuan ummah sebagai asas yang amat penting bagi mempertahankan lima maqasid syariah iaitu mempertahankan agama, nyawa, keturunan, akal dan harta. Jika di Asia Barat punca perpecahan disebabkan perbezaan pegangan aliran kepercayaan misalnya Sunah dan Syiah. Tetapi di negara kita sejak merdeka, kerenggangan antara sesama Islam lebih disebabkan oleh perbezaan pegangan politik kepartian.

Perpaduan ummah amat ditekankan dalam Islam kerana dengan semangat ini, umat Islam akan lebih dihormati dan tidak mudah diperlekehkan kerana berselisih faham sesama sendiri. Allah SWT berfirman, *'Dan berpegang teguhlah kamu sekalian kepada tali Allah (agama Islam) dan janganlah kamu bercerai berai dan kenanglah nikmat Allah kepada kamu ketika kamu bermusuhan-musuhan (semasa jahiliyah dahulu), maka Allah menyatukan diantara hati kamu (sehingga kamu bersatu padu dengan nikmat Islam), maka menjadikan kamu dengan nikmat Allah itu orang Islam yang bersaudara. Dan kamu dahulu telah berada ditepi jurang neraka (disebabkan kekufuran kamu semasa jahiliyah), lalu Allah selamatkan kamu dari neraka itu (disebabkan nikmat Islam juga). Demikianlah Allah menjelaskan kepada kamu ayat-ayat keteranganNya, supaya kamu mendapat petunjuk hidayahNya'* (Al-Imran: 103).

Parti politik yang didukung bangsa Melayu wajar mengurangkan perbezaan isu-isu politik yang merugikan Islam dan ummah. Asas perpaduan ummah bermula dari hati kita, sesama bangsa Islam. Asas perpaduan ummah bermula dari hati, sesama bangsa Islam. Kesatuan hati ini akan membuahkan kasih sayang dan amal bagi meningkatkan lagi kebaikan kepada ummah.

Orang Melayu bermuzakarah atas beberapa asas. Sesiapa yang mengucapkan kalimah shahadah adalah saudara kita. Kita bertemu dan berkumpul atas dasar kasih sayang Allah SWT dan melaksanakan perintah-Nya.

Semua pertemuan atau gabungan hanya untuk mendekatkan diri kepada Allah SWT dan melakukannya atas nama-Nya semata-mata. Apabila ini semua dapat dicapai, maka langkah seterusnya ialah satu tahap yang lebih tinggi iaitu kita setia dan bersedia bersama-sama untuk

berjihat dengan berbagai cara, lebih daripada luahan hati demi memartabatkan Islam dan ummah.

Negara kita kini sudah berjaya melahirkan ramai graduan dan golongan profesional, namun masih belum dapat untuk mengukuhkan perpaduan ummah. Kematangan dan kecemerlangan kita dalam bidang profesional belum dapat dimanfaatkan sepenuhnya. Kita mungkin melahirkan ramai cendekiawan, namun kita masih mengharapkan ramai yang bijaksana yang dapat membuat pertimbangan dengan teliti terutamanya dalam agenda memperkasakan perpaduan ummah.

Perpaduan Islam

Dengan adanya perpaduan Islam dan Melayu, rakyat negara ini akan bekerja sebagai satu pasukan untuk menjadikan negara ini maju dan progresif yang mementingkan keadilan dan kebajikan rakyat. Islam adalah agama yang mementingkan keadilan dan kebajikan masyarakat dilaksanakan sepanjang masa.

Wadah dan maslahat Islam serta Melayu perlu terus diperjuangkan. Justeru, semua pemimpin Islam dan Melayu yang diberi tanggungjawab menjaga agama Islam, pertubuhan politik, badan profesional dan badan bukan kerajaan yang dipimpin oleh orang Islam dan Melayu perlu berganding bahu dan memainkan peranan masing-masing bagi memperkasakan ummah.

Gabungan kepimpinan Islam dan Melayu yang ikhlas berjuang bersama rakyat yang cintakan perpaduan akan menjadikan penyatuan ummah yang unggul. Akhirnya kita mahu melihat Islam sebagai agama yang difahami dan dihormati. Amalan politik yang menyatukan ummah akan menjadikan orang Melayu sebagai bangsa yang disegani dan bermaruah di negara Malaysia tercinta ini.